

SPORAZUM

O TRGOVINI I EKONOMSKOJ SARADNJI IZMEĐU REPUBLIKE BOSNE I HERCEGOVINE I REPUBLIKE TURSKJE

Vlada Republike Bosne i Hercegovine i Vlada Republike Turske (u daljem tekstu: Ugovorne strane),

- u želji da unaprijede i prošire korisne ekonomske i trgovinske odnose među svojim zemljama na stabilnoj i uravnoteženoj osnovi,

- u cilju daljeg jačanja svojih prijateljskih odnosa na principima jednakosti, uzajamnog poštovanja i obostrane koristi,

- uzimajući u obzir principe utvrđene u Ugovoru o prijateljstvu i saradnji između Republike Bosne i Hercegovine i Republike Turske, potpisanom 4. februara 1994. godine,

dogovorile su se o sljedećem:

Član 1.

Ugovorne strane će, u skladu sa svojim važećim nacionalnim zakonodavstvom, preduzeti potrebne mjere u cilju razvoja i proširenja uzajamnih trgovinskih odnosa na dugoročnoj, stabilnoj i uravnoteženoj osnovi, kao i u cilju proširenja ekonomske saradnje u okviru postojećih mogućnosti.

Ugovorne strane saglasile su se da podstiču i unapređuju razmjenu roba i usluga, zajednička ulaganja i finansijsku saradnju.

U tom pogledu, obje strane olakšat će saradnju između njihovih preduzeća, posebno u slobodnim trgovinskim zonama. Ova saradnja takođe obuhvata zaključenje ugovora u vezi sa aktivnostima u njihovim zemljama i na trećim tržištima.

Član 2.

Ugovorne strane dodijelit će jedna drugoj tretman najpovlaštenije nacije u pogledu carinskih dažbina i naknada bilo koje vrste koje se primjenjuju na uvoz i izvoz u njihovim zemljama.

Ova odredba se ne odnosi na:

- 1) Povlastice date susjednim zemljama radi olakšavanja pogranične trgovine.
- 2) Povlastice koje proističu iz sporazuma koji vode ili mogu dovesti do carinske unije ili zone slobodne trgovine, čija članica jeste ili može postati bilo koja od Ugovornih strana.
- 3) Povlastice odobrene u cilju stvaranja posebnog aranžmana sa zemljama u razvoju u oblasti ekonomskih i trgovinskih odnosa.

Član 3.

Ugovorne strane će, u skladu sa svojim nacionalnim zakonodavstvom, preduzeti potrebne mjere da se izuzmu od carinskih dažbina i naknada nekomercijalni uzorci uvezeni u zemlju, i roba privremeno uvezena u svrhu izlaganja na sajmovima.

Član 4.

Ugovorne strane su se saglasile da, u cilju poboljšanja i proširenja bilateralnih trgovinskih odnosa između svojih zemalja, olakšaju i ubrzaju razmjenu informacija, da podstiču kontakte između poslovnih ljudi i da pruže podršku učešću na međunarodnim izložbama i sajmovima koji se organizuju u njihovim zemljama.

Član 5.

Ugovorne strane saglasile su se da potpomažu saradnju između svojih zemalja u oblasti industrije i tehnologije.

Ugovorne strane su, između ostalog, identificirale sljedeća područja kao moguće oblasti saradnje:

- rudarstvo i metalurgija,
- industrija željeza i čelika,
- građevinarstvo, niskogradnja i građevinske usluge,
- hemijska industrija,
- farmaceutska industrija,
- šumarstvo i drvna industrija,
- gotovi proizvodi od drveta i nemetala,
- tekstilna industrija,
- industrija kože i obuće,
- metaloprerađivačka industrija,
- elektro i elektronska industrija,
- informatika i upravljanje proizvodnjom,
- transport i komunikacije,
- proizvodnja vozila,
- poljoprivreda i prehrambena industrija,
- turizam,
- zanatstvo.

Član 6.

Ugovorne strane saglasile su se da saraduju na obnovi i izgradnji industrijskih struktura u Bosni i Hercegovini, kao i na drugim infrastrukturnim investicijama.

Obje strane pružit će povoljan tretman svojim kompanijama koje su voljne da učestvuju u takvim investicijama.

Član 7.

Sva plaćanja u vezi sa uvozom i izvozom robe i usluga između dvije zemlje obavljat će se u konvertibilnim valutama, ukoliko se drugačije ne dogovori, u skladu sa važećim zakonodavstvom svake zemlje.

Član 8.

Uzimajući o obzir značaj bankarstva u razvoju uzajamnih ekonomskih i trgovinskih aktivnosti, Ugovorne strane saglasile su se da unapređuju saradnju između banaka svojih zemalja.

Član 9.

Ugovorne strane sporazumjele su se da što je moguće prije preporuče svojim odgovarajućim organizacijama da upotpune zakonsku regulativu, na osnovu koje će poboljšati trgovinsku i ekonomsku saradnju između dvije zemlje prilikom zaključivanja sporazuma o recipročnom unapređenju i zaštiti investicija, izbjegavanja dvostrukog oporezivanja, telekomunikacija i transporta itd.

Član 10.

Ugovorne strane odlučile su da osnuju Zajedničku ekonomsku komisiju Bosne i Hercegovine i Turske u cilju praćenja primjene ovog sporazuma i razmatranja pitanja za daljnje proširenje bilateralnih ekonomskih i trgovinskih odnosa.

Ova komisija će biti sastavljena od predstavnika koje imenuju njihove vlade i sastajat će se u međusobno dogovoreno vrijeme u Bosni i Hercegovni i Turskoj naizmjenično.

Član 11.

Ovaj sporazum ne utiče na prava i obaveze Ugovornih strana, koje proizilaze iz važećih bilateralnih i multilateralnih međunarodnih sporazuma.

Član 12.

Bilo koji spor između Ugovornih strana u vezi sa tumačenjem ili primjenom ovog sporazuma rješavat će se prijateljskim konsultacijama i pregovorima u razumnom vremenskom roku.

Član 13.

U slučaju otkaza ovog sporazuma, njegove odredbe će se i dalje primjenjivati u odnosu na bilo koju neispunjenu obavezu prema ugovorima zaključenim u periodu važenja Sporazuma.

Član 14.

Ovaj sporazum stupit će na snagu na dan kada Ugovorne strane obavijeste jedna drugu na diplomatskom nivou da su ratifikacione procedure završene i ostat će na snazi za period od pet godina.

Ovaj sporazum produživat će se automatski za naredne periode od po jedne godine, osim ako neka od Ugovrnih strana ne obavijesti drugu pismenim putem o otkazu Sporazuma, i to šest mjeseci prije njegovog isteka.

Potpisano u Istanbulu na dan 7.11.1995. godine, u dva originalna primjerka na engleskom jeziku.

**Za Vladu
Republike Bosne i Hercegovine
Džemal Čabaravdić, s.r.**

**Za Vladu
Republike Turske
Necat Eren, s.r.**